

鈍盒勝錄卷三

醴陵 傅熊湘 鈍安

詩文得名家評點。每覺精采煥發。最爲讀者所珍。張文襄書目答問。亦嘗及之。龍陽易順鼎實甫。嘗刊行文襄評點。其所爲廬山詩錄。暇日披覽。則知此公鑑賞有真。不惟一時宏獎已也。錄中以青玉峽栖賢澗石噴雪亭數首。最爲文襄所賞。謂可稱偉觀。尤賞其萬杉寺一首。至稱爲古今奇作。總評云。此卷詩瓌偉絕特。如神龍金翅。光采飛騰。而復有深湛之思。佛法所謂真實不虛。而神通具足者也。有數首頗似杜韓。亦或似蘇。較作者以前詩境。益臻超詣。信乎才過萬人者矣。其期許可謂甚至。青玉峽龍潭云。蒼崖天所圍。徑轉吐雄瀑。靈山孕真源。金膏出其腹。奔雲從空來。數里勢屢曲。意嫌鴻濛隘。未肯受迫束。化工惜元氣。萬古

與之蓄。跌爲孤潭幽。神物有起伏。行徐向平川。餘響戛寒玉。誰云一泓  
窘。百寶可沐浴。倒穿大瀛底。日月亦入綠。地深雲霞多。自暮抵朝旭。如  
聞清猿啼。下飲澗水淥。茲區實琴德。冥接軒與頊。遂令遺世士。無言轉  
溫肅。鐫痕洗春苔。萬石盡可讀。我遊豈云屢。終老難饜足。若有離騷人。  
攀蘿照奇服。題上兩圈。詩中化工六句連點。誰云二句連圈。評云。數語  
真實。體物力量甚大。餘皆單圈。惟茲區四句。既圈復抹。栖賢澗石歌云。  
栖賢澗谷有奇石。倒臥青冥神所擘。鼇背驚翻海水飛。龍髯陡接天雲  
立。奔霆日夜搖撼之。萬古雲山皆霹靂。跌勢紛如矢墜空。涓流巧作珠  
穿隙。其旁清穩百盤陀。倚澗臨流可敷席。水石相遭豈不平。自從天籟  
發。噌吰道人兩耳癡聾久。問是水鳴還石鳴。試撫孤琴動山響。方知水  
石兩無聲。題上三圈。跌勢二句連圈。其旁以下。至篇末。連圈。評云。沈著

而又超妙。如有神助。非人力所能爲也。

張文襄評易實甫廬山詩。噴雪亭瀑云。驚雷破山龍衙衙。數里已聞飛  
瀑譁。隔山兩重可望見。猶被青障微相遮。連岡疊嶺起又伏。其徑屈曲  
常山蛇。先聞絕境早神往。一旦得路如奔鷹。適逢峻壁梯磴險。以手代  
足相鈎爬。滿山石鏡亦可悅。日光照耀瑩丹霞。三步回看五步坐。遠銜  
鄱嶺明金沙。力窮足繭瀑始出。兩谷跌斷中豁豁。觀龍垂胡各叫絕。乃  
歎述者言非夸。泣珠恍探泉客窟。織綃疑入鮫人家。細如煙紈襲霧縠。  
危若冰柱轉雪車。何年共工陷鼇極。海水傾向東南斜。九州失驚兩脚  
逗。袖手頗復哀神媧。青霄倒垂星宿海。客欲往泛愁無槎。力穿深潭九  
地破。對足或抵歐羅巴。橫飛水氣百步外。色有騰綠兼頰赭。凄寒頓成  
滿肌粟。奇幻疑是雙眼花。石梁界空何代造。我意未較天台差。其旁獨



此詩蓋爲廬山卷中第一。餘如第六泉云。靈斟道漑得天全。那欲供渠蟹眼前。誤識人間老桑苧。幾回封寄九江船。全首連圈。評云。七言絕句勝境。又山中觀物雜詠。猿云。澗失女猿久。千錢新贖歸。莫啼深峽樹。防濕定僧衣。籠檻刑應免。山林事已非。主人蔬果儉。恐爾亦難肥。題上三圈。前四末二俱連圈。仙人掌云。一尺仙人掌。殘魂詎自嗟。榮華儕蟪蛄。斷爛委蟲沙。大化原無朕。微生共有涯。支離吾欲懣。截臂問三車。題上二圈。三四連圈。螢火云。百草未成腐。流螢何遽多。隔闌吹不度。當澗墜如何。微物關秋氣。空山映晚砒。誰持白日照。仙魅在巖阿。題上二圈。起結兩聯連圈。評云。三首大似杜矣。又總評有云。作者才思學力。無不沛然有餘。緊要訣義。惟在割愛二字。若肯割愛。二十年後。海內言詩者。不復道著他人矣。又云。此卷中未加評識者。似可不存稿。在他人則金玉。

在作者則土苴耳。何爲存之以自掩其菁英哉。此時作者未必以爲然。十年後當味鄙言也云云。此尤切中才人之病。兼亦可爲存稿之法。湘中六十年來詩人。能爲宋詩者。莫若隆觀易臥侯。其詩余旣多錄之矣。顧不甚詳其行事。恐論世者無徵。蓋近世以宋詩鳴而流風沾漑一代者。首推義甯陳伯嚴。伯嚴之尊人右銘中丞。實始刊臥侯罌草堂集。其時爲光緒三年。序中推許甚至。則臥侯者。殆亦伯嚴詩派之所從出也。余故嘗持此論。而岳生谷謙近得王湘綺所撰隆觀易小傳見寄。謂此傳所以不刊於隆集者。以其中有曲筆。邑人士不欲厚誣前輩。蓋傳中里豪。謂劉果敏典字克庵。官至陝撫。於邑中公益。如創建試館書院。用力至勤。士林咸被其惠。而傳稱觀易父任俠。其實故老多言其父建訟。訟詞又至鋒利。故以見殺。此語果信。在今日宜若無不可傳。然吾

所見罌集。凡數本。俱義甯原刻。甯鄉人似不曾重刻者。則此傳之不傳。實則刻集無與。王翁此傳。舊嘗刊之長沙日報。其文極往復詠歎之致。讀之未嘗不隕涕。史稱詩三百篇。大抵皆古聖賢發憤之所爲作。此人皆意有所鬱結。不得行其道。故述往事。思來者。垂空文以自見。成一家之言。然則欲知臥侯之詩之所由工。固不可不讀此傳矣。傳云。隆觀。易。字无譽。甯鄉人也。父任俠。爲里豪所讎。觀易年十餘。避走衡陽。易姓名。居蓮湖書院。從生童誦讀。穎異幼學。詩文幽苦。衡陽歐陽生時爲館師。察異之。詰其自來。具愬其冤。生女夫曾國藩屬。以侍郎治兵衡州。移文甯鄉。悉反其事。捕繫其父。所怨家數十人。欲窮治其獄。時駱秉章爲巡撫。以國藩侵官權。固不樂。里豪乃徧愬其縣吏士。因左宗棠告巡撫。徑下檄。用便宜斬其父。事又大反。觀易甫歸。遇奇變。卽又竄走山谷間。

有廖翁者。知其冤。客舍之。資其衣食。觀易日長。學亦日進。旣逃死不敢出。唯與二三相知。不涉世事者。以詩寫其憂。不襲于古。自發抒其憤。所遭際然也。歲久事益解。而怨家猶盛。不敢入城市者。二三十年。縣人文武達者。皆無因與相識。後乃識廖樹衡。樹衡奇其才。哀其遇。稍稍言于官。士間義甯陳寶箴。好奇士也。得見觀易。特以爲詩人之窮者。又隱匿不自拔耳。然尤善其詩。爲之刊行以示人。人亦未之間也。觀易旣久。抑不得奮。思遊關隴。從軍絕塞。以自振。光緒初。過寶箴寓邸。辭而行。行未至嘉峪。道卒。年四十一。妻某氏。困約時所娶也。有子蓼蓀。貧不能自存。樹衡合其友數人經紀之。出其詩以示王闔運。王闔運曰。自軍興以來。搜求振拔文武之材多矣。曾侯尤好文。一介之士。一語之善。未嘗不知賞也。余居家亦汲汲于遺才。自謂無遺焉矣。乃初不知有隆生。知之矣。

不知其阨窮之由。夫文章易見耳。當吾之身。百里之內。而使斯人顛到侘傺以終。可不悲乎。

岳陽方榮秉厚卿。有求志堂詩集。李洞庭爲捐存省館。因屬入錄。厚卿以拔貢中舉。考取內閣中書。改官邵武同知。以母憂去官。爲人掌章奏。民國四年卒。所著有詩小記。漢書訂注。及詩文集。其兄榮穀稱其詩學博覽而與杜相終始。嘗與人論詩。以謂少陵運逸氣於韻律之中。振符采於骨格之外。亦足見其所詣矣。其弟榮穎迺實。南社社友也。爲搜輯刊存之。固城驛題壁云。山影落牀頭。溪雲繞舍流。石樓晴亦潤。土室夏先秋。犬吠孤村靜。蟲鳴四壁幽。今宵固城驛。聽雨動鄉愁。曉發黃門鎮。云已歇黃門雨。仍經赤坂泥。天開一峰霽。人在太行西。瘦馬愁緣磴。殘虹渴飲溪。平生輕險阻。回首意都迷。殘虹五字奇闢。寄王澤寰云。移山

填海志猶存。湘上秋風早閉門。黨籍沈埋聞子在。江湖流落亦君恩。朝端水火今逾昔。地下忠魂骨尙溫。欲話模糊十年事。填膺萬恨不堪論。此詩極見沉鬱蒼涼之致。集中似此亦不可多得也。借璞餘厚庵兩弟遊退省庵云。風月初秋水氣激。間呼小艇撥荷菱。湖山漸覺遊人少。身世無端小閣憑。萬竹一庵標退省。廿年百戰想飛騰。明禪卽是菟裘地。愧爾書生殺賊能。此其越遊作筆甚健舉。退省庵爲彭剛直浙居地。在三潭印月。今爲浙江先賢祠矣。睡起云。綠陰長夏掩柴扉。睡起西窗見晚暉。因病得休元不惡。習閒成嬾轉增欷。鏡中白髮三千丈。大壑蒼皮四十圍。偃蹇豈堪當世用。萬生回首意多違。三句用坡語。對句轉勝。後四一氣貫注。大力包舉矣。

梅鏡源字小霖。爲霖生禮部長子。嘗師事鄧湘皋。胡文忠巡撫湖北。招

之入幕。旋署宣恩知縣。有政聲。文忠嘗與益陽周笠西慨論人才。有甯鄉二梅子之稱。二梅子者。其一爲小霖弟掬海。曾知徽州府者也。小霖卒年七十。有愉園詩集。其從子雨蘇。錄以見遺。泊營田云。風雨瀟瀟夜。孤舟拍岸橫。柝聲催浪吼。漁火射窗明。路遠鄉音改。春寒客夢驚。鄂王祠宇近。懷古不勝情。孝感道中云。小坐輕車去。川原跋涉勞。綠肥鋪野麥。紅艷醉山桃。峰近還疑遠。天低漸復高。孤城聊止宿。破悶有香醪。謁楊忠勇公云。廟貌森嚴色相真。此間俎豆有完人。鋤奸敢進批鱗諫。雪涕徒冤報國身。千載忠肝歸洞鑿。遺詩風骨總嶙峋。我來敬採溪毛薦。安得先生再秉鈞。送周荇農壽昌入都。兼呈曾年伯滌生云。元龍意氣會高騫。蓮幕偏容置少年。顧我空投禰氏刺。讓君先著祖生鞭。巴山夜雨孤亭酒。淮海長風萬里船。中秘有人勤誦讀。定知文字結新緣。斷雁

吟哭仲弟景寧君作云。尺素飛傳舉室哀。斯人何竟不生回。季羸纔痛塵緣謝。叔豹旋驚噩耗來。卅載馳驅成逝水。百年牢落鬱奇才。嗟予死後悲胡極。空自招魂楚水隈。曾侍京華椿樹殘。近傷護草淚難乾。廿年權局勞籌饗。兩度都門謁選官。果見士民頌生佛。早知絃管譜吟壇。文翁化蜀何多讓。此日同悲雲水寒。萬里欖槍動海氛。河陽咫尺柝相聞。定知拍馬爭摧敵。底事飛鳧不見君。兒女婚姻多未了。公私負累鉅堪云。我當一力仔肩任。且祝靈輻返社枌。往返郵筒交警深。而今風雨夢難尋。鄉鄰猶頌寬仁德。臧獲都懷惋惜心。嗣子麻衣悲客路。良朋雪涕嘆人琴。佳城鬱鬱北邱上。好待棲靈夜月沈。其詩直寫懷抱。略無牽強之迹。余錄梅氏詩至多。亦足見其家教有自也。

王君澄盦函檢詩鈔一帙見遺。書云。亡友趙君學淵。曾以其鄉先生李

漢翼詩稿屬爲選錄。謬以管見。選出二卷。倩人寫定。後爲送友人吳陰雲覆閱。陰雲以墨筆圈出四十餘首。客冬學淵云。將與同鄉謀付排印。屬再加斟酌。因復用朱筆標識一過。不意學淵今春遽爾物故。此册遂無所歸。既痛學淵重悲李之不幸。心常耿耿。側聞先生網羅文獻。表章遺逸。而李又屬鄉人。用將此本送請鑒核。可否擇入大著勝錄。並將此本存之圖書館中。俾李畢生精力。獲留鱗爪。學淵表揚之苦心。亦藉以稍慰。惟先生裁之。至李之原稿。似尙存學淵家中云云。王君名允猷。籍紹興。宦湘。與余不相識。而用意甚厚。學淵去歲雖間相見。顧未嘗爲余及此。李名鵬齡。字漢翼。醴陵人。所著曰驤雲山房詩稿。蓋居邑西三區。並其姓名亦未有聞。澄盦跋中。稱其生當嘉道間。抑鬱不得志。教授鄉里以終。世罕知者。當學淵求稿時。李之孫已遠傭。稿亦入他人手。展轉

始得之。稿凡五册。前四册起道光辛巳。訖庚戌。計詩千餘首。係著者手自編定。別一册。起咸豐壬子。訖己未。計詩百餘首。蓋訂稿後續得之作。余嘗求邑先輩著述。久無所得。得此甚喜。猶恨未見原稿。爲函學淵之弟惠民。子駿聲。求之。備他日刊行。茲就鈔本亟錄數首如下。五言如春晚云。春晴開衆妙。晚景麗平原。芳草綠千里。亂峰青一村。留雲開竹徑。待月臥花垣。不寐思前事。松窗啼夜猿。舟中感懷云。落日古渡頭。煙波生亂愁。遙憐終夜月。獨照片帆秋。旅夢縈江樹。灘聲上酒樓。壯懷無限事。不僅覓封侯。晚歸云。落日萬松間。松陰覓路還。攀芳過石澗。放眼睇煙寰。遠火前村樹。疏鐘隔岸山。歸來門不掩。心與白雲閑。俠客云。對酒不知老。長歌天地秋。一身湖海氣。雙劍古今愁。慷慨寄生死。安危隨去留。何須論成敗。惟自急恩讎。諸作脫體頗高。俠客一詩。尤足見其懷抱。

不獨芳草亂峰疏鐘遠火寫景清切也。

驤雲山房詩中七言。如重九登高寄研山云。楓葉紛紛落日明。川原迢遞望中平。雲收洞壑雙眸迥。秋入江湖萬里清。不盡西風吹木落。蒼然暮色共愁生。登臨有興懷同調。恨未前宵折簡迎。秋夜感懷寄白航云。碧空秋靜斷鳴蟬。欹枕懷人月未圓。野迥河流高樹外。風多螢亂晚燈前。關山戎馬愁三載。風雨交情感卅年。短褐書生慚學劍。論功何處勒燕然。九日作云。清秋無奈獨登臺。悵望烽煙夕照催。佳節正逢重九日。故園孤負菊花杯。樽前白髮西風老。江上青山畫角哀。愁絕雁聲從北度。那堪羽檄又南來。律詩措語略不費力。所謂不著一字。儘得風流。是有真宰與之沈浮也。又其五言古。如遊迴龍山盤溪寺云。巖嶂疊縈紆。客行嶺忽斷。趨途泝碧流。陡覺千峰亂。山勢繞迴龍。溪流盤匹練。樹深

白日寒。竹冷秋聲遍。仙杉何年留。蚪幹鬱葱蒨。每經風雨夕。恍惚神采現。雲雷連陰黑。晦明光屢變。此間多古物。俯察足清眇。聞鳥且息機。聽禪轉增戀。坐久迷歸途。蒼翠色如澱。此種蓋亦規仿二謝爲之。足見其詩學所詣。斷句如大雪云。樹杪凍雲千戶暗。馬頭寒色萬峰低。對句特勝。聞雁云。一彎涼月山河冷。萬里水雲天地秋。歸途云。自愛名山還故里。恰逢寒雨上征衣。俱極自然。秋興云。夜氣千山淨。鄉心一雁孤。小院云。水靜魚吞月。春深鳥夢花。吞字夢字甚鍊。秋雨云。雁歸千樹冷。人語一燈寒。馮家山云。石泉秋瀉月。山碓夜春雲。涼思云。晚鐘黃葉樹。孤棹白蘋江。宿村莊云。遠天依水盡。歸雁帶秋還。其清新俱不可及。置之淶江詩存中。當不在諸老輩下矣。

門人湘陰王存統原一。以其伯父清濂遺詩請錄。清濂名鑑。喜吟咏。思

之至深。生平多不得志。鬱鬱以沒。所著曰安遇齋詩草。原一能文章。習法政。嘗應考爲縣長。列第一。試署岳陽。數月去官。汲汲治學。思繼述先志。可謂賢已。重九登玉池云。閱盡艱辛到碧空。徧搜清景趁秋風。雲開岳塔浮天外。水落湘帆掛鏡中。靈氣附枝仙貌古。石梯懸徑寺門通。一尊茱酒難同醉。惆悵東西散處鴻。秋晚偕友人登湖鼻云。懸崖峻嶺撥雲過。古寺蕭條鎖薜蘿。紅樹未凋經雨少。青山無恙閱人多。天空遠岫浮靈鷲。水漲平湖失翠螺。薄暮晚煙墟落起。笑偕仙侶下危坡。按玉池湖鼻兩山對峙。郭筠老居玉池。稱玉池老人。卽其地也。春望云。風吹殘滴斷檐前。徙倚高原景物鮮。紅雨亂飄寒食後。綠波新漲小橋邊。春沽野店香浮甕。水匯溪田韻入絃。怕遣韶光空過去。歸來皓月滿川前。登君山云。一峯突兀聳湖中。氣象巍巍海市同。四面環攻濤似鼓。萬艘遶

過路如弓。奇芬繚繞茶三徑。古色斑斕竹幾叢。行到洞靈拜遺像。二妃香火殿前空。俱作皆不假鍛鍊。純任自然。又嘗作棲霞山大花園歌。蓋欲以山爲自然之花園。其通脫可想見也。詩云。豪富人家重游嬉。治園種花勞設施。但期布置適己意。不憚經之與營之。鳥獸草木靡不備。山林泉石無或遺。經年累月不得就。工匠夫役筋力疲。牆垣周圍高百尺。旁人未許鑽穴窺。一朝人去黃金盡。亭閣邱墟問者誰。山人數奇長窶貧。欲築園囿無鉅貲。放開眼孔縱吟眺。別有會悟人不知。棲霞山外高且廣。天然不假人修爲。背倚湖鼻高萬仞。面臨達摩尤險巖。玉池巋然峙其左。雁峯右聳如列陣。春風細細扇微和。梨桃李開滿枝。夏日舒長抵年小。稻花滿畦荷滿池。秋來商音送萬派。丹楓黃菊三徑欵。隆冬霜高百卉斂。竹松與梅缺可彌。貔狼熊虎豹豺兕。驪鹿獾麕兔狸。觀

鷹雀烏燕鶯雉。雁鷺鷗鶩鳩鵲。飛飛走走名不一。欲求識之須學詩。更有家常習見物。六畜無數長蕃滋。山水偶然發天籟。清音勝卻竹與絲。同井共鄉飽吟玩。詩人文士遠亦馳。樂遊金谷生秋草。此園終古無歇衰。桑田轉眼滄海闊。此園屹立長不移。豈惟我生終身看不盡。直到子孫數世萬世無窮期。詩雖不盡工。然語特豪宕。人謂近世天竺太戈耳詩得大自然化。如其爲人。此卽昔人畫工也。亦化工也之說。知此則安遇之詩。與其爲人。俱可見矣。

業師吳先生稱三諱德襄。醴陵人。居石筍山下。故自號筍樵。嘗受學於道州何紹基子貞。清咸豐間拔貢。歷城步縣教諭。寶慶永州府學教授。慎於出處。在學宮凡四十年。一無干謁趨奉。爲學長於考證。藏書萬卷。皆手自校釋。朱墨粲然。爲當世名流所推重。教人以自拔流俗爲歸。誘

掖後進。惟恐不及。晚年主講邑中淥江書院。學風丕振。士類宗之。宣統元年卒。年八十二。著述甚富。有石筍山房詩鈔。邵陽謝永謬筠士所稱爲學宗。漢魏三唐際。品在明賢七子間者也。嘗應羅研生舍人之招。集荷池。作荷花生日。因和其與何媛叟倡和詩。極爲諸老宿所激賞。以此得重名。詩云。去年今日旅幽燕。今年今日栖古禪。自注時寓古泐潭寺荷池詩人

雅好客。清晨折柬邀我前。云爲荷花作生日。二三耆彥來後先。自注時何媛叟

師周韓臣師暨周幼龔大令周漱庵廣文同至舉杯欣然相告語。花葉茂密逾往年。往時池涸

花無色。今對出水盤珠圓。池上更添新種竹。沿階淨碧修娟娟。每當三五月明下。琅玕篩影荷風扇。披衣啓戶獨尋賞。中宵不<sub>レ</sub>醒幽眠。在昔東坡元豐日。夜遊妙境談承天。清光自多會自少。先生得此誠何緣。况復等身勤纂述。窮搜不遺湖湘賢。長生久視卽此是。壽世豈必皆神仙。

城南老翁年七十。里居故在蓮溪邊。酒酣詩句成頃刻。螢藕菡萏意窮考。研一時倡和累篇牘。清波新葉同徵鮮。呼僮走示且索和。同人聚誦爭鈔傳。我生少小苦鈍拙。卅載故物仍青氈。爾雅詩疏雖間讀。芙蓉菡萏徒朝搴。花生此日起何代。令我數典心茫然。蓬心茅塞久無用。可借花光一洗湔。此詩一氣貫注。波瀾老成。頗似蘇長公諸作。又不得以明七子限。宜爲一時老輩歛服也。

石筍山房集中。古體而外。近體尤以七絕爲最工。初夏雜詩云。綠樹環窗作午陰。鴨爐香襲海南沈。晝長人靜渾無事。自寫新詩放浪吟。微雨纔過澹日暉。小園入夏豆苗肥。晚拋書向閒階立。欲下簾櫳燕未歸。日灌園瓜抱甕勞。深宵喜聽雨聲豪。曉窗醒枕聞人語。溪水新添一尺高。山溪新漲浪淙淙。野碓依橋水自舂。半日長隄行未遍。城中聽打普和

鐘。人煙起處是誰家。木槿遙開一樹花。畫出江村好風味。密編黃竹作籬笆。風韻頗似簡齋。而深穩無江湖氣。則其品勝之也。甲申九日卽事云。去年曾上文昌閣。佳節攜朋更一游。禾黍全收平野闊。客中登眺最宜秋。飛山廟裏數游蹤。問卦求籤戲打鐘。今日廟傾鐘亦墮。重尋杯琖又無從。龍井秋晴不斷泉。潺湲聲咽夕陽天。初游詩句分明記。回首匆匆十八年。春風二月小園來。細雨攜鋤種菊栽。却喜今年花事好。重陽時節一齊開。俱淡而有味。其他類此者多。不能悉錄。七言律如飲龍王閣云。城南高閣擁崔嵬。山色回環水四圍。千畝稻苗青漸晚。一棚瓜葉綠初肥。溪聲激激鳴長晝。橋影彎彎臥夕暉。盡日釣魚人不去。竹竿低拂晚風微。城樓春望云。斫劍高歌興未降。春風何處賦蘭茱。乍飛乍下鶯三兩。時去時來燕一雙。簷外杏枝低墮瓦。階前桃葉密遮窗。側身獨

倚城南望。斜日依微。落晚江。寫景語能工切。五言律。如幽居云。春水碧如染。春山翠作堆。筍穿牆角出。桃傍案頭開。粗糲隨餐飽。輕衫稱體裁。幽居無長物。瓜芋一時栽。皆具風格。良由胸次涵虛。空靈入抱。故出語婉妙。和以天倪。在在見其素養也。

偶檢舊長沙日報。得詩二焉。一爲貝元澂允所遺箸。一爲孔昭綬競存遺著。二君皆瀏陽人。俱從事新聞及教育事業。其卒也。又皆以去歲。貝君卒於長沙。社會人士爲營公葬於妙高峯。特典也。孔君卒於金陵。歸櫬長沙。葬北關外湖蹟渡附近某山。余嘗著論報端。謂貝君立身行己。和而不流之節操。與其待人接物藹然仁者之風度。皆足以模範人聲。孔君淡於榮利。義不妄取。分不苟求。爲學頗兼孔墨之長。而律己之嚴。又與宋儒爲近。蓋二君者。皆畢生盡瘁於社會事業。而交與余好者也。

二君於詩皆不常作。讀其詩可想見其爲人。蓋不惟存其詩也。貝君留別湖南省立第二師範學校同學諸子云。青藍色增勝。冰水氣逾寒。恆性非有異。學力蘄各殫。橫舍集英彥。講習有餘歡。豫章初萌蘖。棟梁儼鬱蟠。嗟余此承乏。兩載媿素餐。臨歧共留景。惜別聊贈言。達人貴自我。君子慎幾先。曷分舜與跖。所辨義利間。匪義路不正。匪仁宅不安。知言養浩氣。緝熙厥心單。魯齋治生說。紕繆宜糾彈。樂天與憂世。並行若循環。良知炯內覺。典籍皆蹠筌。兼善識時務。周馳域外觀。修辭期達志。餘事弄文翰。遊藝隨所適。莫令多暇閒。沒羽自射虎。撫弓已啼猿。精誠格天地。所至無險艱。雷穿泰山石。綆斷井上韓。積微以成著。洪流起涓涓。如彼農穠。力穡必逢年。如彼工雕鏤。智巧由靜專。功勤業始廣。慮深道乃全。禍福爲人召。一墮豈再旋。民生良不易。來日方大難。匹夫有責

任。顯德佛仔肩。卓然樹模範。芳馨挹茵蘭。聖功重蒙養。燭火賴薪傳。離會孰能定。欣悲渺無端。尺牘難盡意。日新各勉旃。貝君在學界爲先進。與譚嗣同復生。俱爲劉蔚廬門人。而劉則服膺船山。以講學自任者也。學人之詩。固不惟以詞采重矣。孔君南社半園雅集分韻得言字云。有錢不沽吳市酒。有屐不登謝公墩。有帽不落龍山頂。有詩不作金谷園。人生隨地自行樂。何用希古相攀援。春雨如膏夜復夜。披衣待日遲朝暉。禁火瞥驚百六日。揀花風度廿四番。半園小集來舊雨。高朋有約開清樽。雪梨冰藕紛羅列。異味新擘宰夫黿。坐中呼飲誰健者。一石不醉誇淳髡。拈題分韻爭擊鉢。須臾腕底萬靈奔。或如百川赴巨海。長鯨吸浪天空翻。或如珠玉供咳唾。燦然錦裳織天孫。又如神仙排雲出。手扶霄漢星斗捫。離奇變幻不可詰。鬼斧神工無鑿痕。探驪得珠珠在握。區

區鱗爪何足論。慨自神州歌板蕩。文采風流嗟僅存。批糠塵垢矜述作。蝸蟾拂羹相呶喧。豈無鸞鳳能協律。自愛羽毛嫌口噉。風雅道喪已閱世。誰歟文獻留中原。驂玉虬兮驅霹靂。敷衽陳詞叩帝閭。摘取列宿羅胸次。廓除陰霾祛煩冤。光華復旦予何言。孔君南社社友。此民國六年上已雅集作。其於詩雖非專業。然苟有所作。固亦不讓人也。

洞庭來書云。任己山大令。名本堯。岳陽人。幕游秦隴豫直甚久。晚官鄂渚。遺著詩文若干首。未刻。因鈔其曩所見示者。屬以入錄。雪夜登黃鶴樓舊址集句云。天末江城晚。征人倚戍樓。風兼殘雪起。月湧大江流。寥落悲前事。長歌懷舊遊。猜嫌成謫宦。遠望不勝愁。可謂裁縫滅盡針線迹矣。隴上送友人東歸集句云。暮雲收盡溢清寒。關塞蕭條行路難。東道倘逢相識問。憑君傳語報平安。與前首異曲同工。過祁山云。山勢一

螺耳屯兵記武侯。地當秦蜀要。名爲漢曹留。故壘風雲慘。斜陽草樹秋。  
長才如此竟。憑弔使人愁。故壘十字寫得蒼莽。過秦安渡云。芳草長堤  
外。垂楊古渡西。一溪新水漲。數客敝船栖。風緊灘聲亂。日高人影低。鄉  
心正愁絕。何處杜鵑啼。日高人影低。實境能肖。臥病云。臥病人難寐。茫  
茫百感生。關山家萬里。風雨夜三更。柝響停還起。燈殘滅復明。放懷愁  
絕處。倚枕待天明。關山一聯雄渾。雜感五首云。隴秦豫直遍游踪。閱歷  
常增道路中。老去自憐還自笑。歸來何去又何從。無聊枯坐三更月。有  
願難乘萬里風。六十年華容易過。不堪衰鬢已成翁。凡事無須去強求。  
乾坤莽蕩一虛舟。青山是處都埋骨。白髮何人不上頭。漫學陶潛詩止  
酒。且隨嚴子釣披裘。如斯世界如斯過。何必殷殷抱杞憂。饑苦驅人隴  
上游。卅年漂泊類萍浮。芙蓉綠水依人况。楊柳春風作客愁。遠到班超

輕虎穴。初歸蘇季敝貂裘。艱難險阻親嘗遍。有志男兒竟未酬。粗官匏  
寄憶黃梅。泮水滔滔捲地來。兩載艱虞勞撫字。一場傀儡漫登臺。嗜人  
獠犬狺狺吠。繞澤飛鴻陣陣哀。邑有流亡嘗自愧。不堪風浪去巡災。注自  
余辛丑任黃梅知縣值大水壞堤請款修築心力交瘁忌者謂報銷不實端方不察竟以誣劾去官避難倉皇返舊廬從  
今不食武昌魚。呼童且刈園中草。教子聊翻架上書。世味久諳多變幻。  
豪情已老半消除。粗茶淡飯隨吾分。一枕西窗未有餘。此則可作自傳  
讀矣。

門人長沙張誦芬女士。往年寓滬。嘗以其尊人文達公百熙退思軒詩  
集見遺。文達起翰林。領尙書。充管學大臣。譽望勳業。震耀一時。而於詩  
尤篤。嘉興沈曾植序。謂其詩從容夷雅。擬諸先唐作者。蓋張文貞公權  
文公之儔。而賦景抒情。瓌麗而清遠。尤有與文貞相近者。繹讀再過。信

所論爲不誣也。近體七言律。如同黃稚樹司馬。李小舫大令。黃鵠磯夜  
眺云。危磯高瞰俯百尺。入望蒼茫天地青。拍岸波濤九秋雪。隔江燈火  
萬家星。雲橫雁鷺宵涵影。風撼蛟龍氣帶腥。放眼山川一明月。側身人  
海幾浮萍。黃鶴樓云。黃鵠磯邊黃鶴樓。樓前黃鶴渺悠悠。古今落日又  
西下。江漢之水長東流。往事百戰忽如夢。倚欄孤吟淒欲秋。能詩崔李  
更誰在。但有白雲千載悠。桃源望隔江諸山云。綠蘿四十三福地。靈氣  
下繞桃花溪。扁舟流水夕渺渺。芳草古洞春萋萋。北望衆壑但烟霧。南  
征幾年無鼓鞶。問津倘得最幽處。便擬結茅辭故棲。書夢云。昨夜王師  
大合圍。驍騰萬馬盡駢駢。八方草木森兵氣。一震雷霆壯國威。天上喜  
看飛將落。陣前生繫左賢歸。濤聲捲地驚殘夢。孤艇燈昏百事非。諸作  
大力包舉。蓋得於杜者爲多。五言律如綦江道中云。地阻蠶叢險。雲深

驛路偏。雨中時見日。山外欲無天。斷岸江橫折。崩巖樹倒懸。向聞蠻井  
絡。愁絕馬蹄前。謁少陵先生草堂之一云。成都舊茅屋。遺構識幽棲。亭  
閣地俱古。江山風始淒。百花一潭近。萬竹四松齊。不見杜陵叟。夕陽空  
鳥啼。俱老筆獨到。絕句如別屠梅君云。風塵荏苒黑貂寒。異代關河馬  
上看。曉日一鞭揮手別。亂沙如雪慘征鞍。皆可誦也。

張文達退思軒集中古體。如短歌行贈王瓌。欽明經云。利莫如昆吾刀。  
陸斷虎兕川屠蛟。佩之辟不祥。魑魅遠遁逃。一朝獻主人。飾以寶匣黃  
金縑。駿莫如大宛馬。五花滿身汗流赭。却立崢嶸山谷間。驕嘶矜寵風  
塵下。時來騰蹕日千里。錦作障泥帶銀鍔。已矣哉。張華伯樂今世無。寶  
刀良馬胡爲乎。爲君作歌三歎息。不如痛飲偕屠沽。嗚乎寶刀良馬胡  
爲乎。聞笛云。秋城月小銀河夕。孤館燈昏正愁寂。萬瓦沈沈露氣深。誰

家冷擲高棲笛。微風低度得纖妙。宛轉悠揚意如惜。此意分明入倚欄。  
相思何處不關山。銷魂莫按楊枝曲。瘦盡離人鏡裏顏。兩詩一悲壯。一  
幽咽。皆非尋常工力所能至也。五古如雜擬云。日月忽云邁。秋氣蕭以  
森。落葉解故枝。寒條莽荒林。生理日凋索。芳華遂銷沈。淒淒感微陽。黷  
黷見凝陰。履霜夫如何。時至良難任。又云。羲轡逝駸駸。絳繩安可維。前  
賢去若引。來哲紛相催。壯顏攬明鏡。豈得無衰頹。天地生我身。我生果  
何爲。吾將叩真宰。天高鬱巍巍。太息不能言。幽憂當訴誰。又云。李斯亂  
天綱。侈議焚詩書。縱無三族哀。甯追斧鉞誅。漂流禍四海。四海紛悲吁。  
安知衰微後。再見功廓如。道晦久彌顯。抱殘在師儒。所以老伏生。遺經  
手區區。又云。學校故莘莘。遺文習孔孟。誣民出邪說。洵若洪水橫。古今  
無異教。天地有真性。聖道在霄壤。不以世衰盛。豈伊夷貊言。加此儒術

正。強哉不變塞。願言師往行。又云。旋蓬無定飄。風花無定飛。人生百歲  
間。勞勞空爾爲。山川送離別。日月生憂危。出門心茫然。但覺景物非。舉  
目何所見。荆榛蔓中道。傾耳何所聞。朔風聲正悲。功名已後時。又不早  
旋歸。獨有楊朱泣。淚下如珠纍。按此詩凡十九首。此擇錄五首。中二首  
論書不終亡於秦火。聖道不終絕於異端。所見尤大。不惟詞采之入古  
也。

友人湘潭方旭芝之尊人鶴卿先生宗翰。以己巳歲除卒於長沙。年八  
十。旭芝具狀乞銘。並寫示其蟹山堂詩稿。屬以入錄。余嘗題其東航雜  
咏云。十年舊夢記依稀。起陸龍蛟跋浪飛。一卷談瀛詩宛在。時衰事與  
壯心違。失笑秦皇與武皇。枉從海上覓仙方。何如六十潭州叟。直把三  
山一葦航。今十九年矣。先生以名諸生歷主教育。邑士多出其門。其爲

詩多淡遠之致。如其爲人。品白鶴泉云。急溜無淪漪。狂瀑少縈紆。山水豈在多。貴以清自娛。愛此白鶴泉。流注自幽隅。嶽麓山氣清。靈秀鍾膏腴。仙人抱玉壺。不受塵垢污。靜士厭喧囂。面目清癯癯。滋潤及蘭蕙。芳馨滿巖岨。或有汲水僧。幸無洗耳夫。仙鶴不復來。欲向雲間呼。雨後眺原上云。一雨洗新秋。夕陽清興發。憑眺原上村。蕭條莽林樾。歸鳥啁啾鳴。滴瀝餘音歇。涼飈振襟裾。秋氣入毛髮。歸途指西山。雲際露蟾窟。中秋無月云。人間有中秋。天上無四時。秋月與秋雲。雲月兩不知。月自天中行。雲向太空垂。於雲乎何尤。於月乎何思。且飲杯中酒。一笑姑置之。俱娟潔可誦。近體如重九日遊范鐸峯題壁云。干戈滿地欲何之。范鐸高棲五代時。亂世桃源餘此地。荒年菊酒負空卮。甘藷苦茗饒清味。竹籟松濤入小詩。極目萬峯重疊處。戰雲迷漫黯湘灘。秋日卽事偶書云。

客中無事閉門居。趺坐藤牀老衲如。每與兒童和笑語。閒看鄰舍種園蔬。烏喧村樹夕陽裏。魚戲池塘新雨初。更有一般行樂處。課孫日讀自編書。試杖云。一枝藤杖筍痕斑。竹徑松陰日往還。緩步閒遊無遠近。芒屨幾兩看溪山。九日遊思古寺云。古寺深林裏。登臨望蔚然。夕陽橫上界。山翠映諸天。此地足高會。無僧空法筵。秋風如送客。吹月下層巔。諸作純任自然。無牽強之迹。蓋多爲晚年筆也。

蟹山老人有濱江雜感八首。爲近歲寓居哈爾濱作。嗣君旭芝嘗遊宦哈爾濱也。其一云。年來好靜默。人事不挂齒。詩句一不作。內觀持以止。今歲忽來東。遠行隨吾子。舟車十日程。江海八千里。老至轉壯遊。甯計首丘死。世亂無安家。自古已如此。其二云。卜宅異鄉居。樂此好林木。樹樹皆榆楊。村村各饅粥。嗜好既不同。比鄰無剝啄。童穉笑語喧。雞犬鳴

吠樂。卽此是桃源。何須問詹卜。其三云。日誦楞嚴經。頗悟無生理。浮雲自起滅。大造何終始。世界本來空。何處著憂喜。古今一刹那。河山同尺咫。紀同與錄異。吾將安用此。其四云。故鄉有丘墓。附郭有隴畝。大兒復有孫。一家十餘口。析爨亦有年。合並相與守。本來骨肉親。亂離情更厚。吁嗟余老矣。此語當訓後。其五云。二男好讀書。嗟哉早喪母。襁負從吾游。咿唔隨左右。迄今四十年。硯田惟世守。父子相依倚。兒女共奔走。來此異鄉居。就養謀升斗。毋爲歌黃鳥。此邦信仁厚。其六云。先世本力穡。世守附郭田。泊余士易農。家貧志則堅。此外無俗好。歲歲坐青氈。負笈從游者。桃李門盈千。迄今八十歲。鬚髮已皓然。回首思疇昔。滄桑世屢遷。其七云。我愛陶淵明。胸次何浩然。讀書不求解。撫琴亦無弦。松菊甘寂寞。守拙樂園田。老死匡廬下。生祭無人傳。無怨亦無尤。千載仰高賢。

其八云。我愛陸放翁。耽吟復嗜酒。鏡湖茅一椽。劍南詩萬首。與彼栗里翁。高名同不朽。我皆景仰之。千載相師友。佳句嘗諷誦。但恨不能酒。安得夢魂中。與之相邂逅。此篇諸作頗似陶。卽事成章。淡而彌永。兼可見其胸次廓然。無入而不自得之概。

亡友湘潭黃堃巽卿。喜爲詩。當己酉庚戌間。余教學西園。與共晨夕。愛其真摯。故視之尤厚。叔容而外。莫與抗也。余旣與諸君刊叔容蘿庵遺詩。嘗欲輯巽卿之鳧翁詩。都爲一集。庚申社集半園。吳悔老首出五金。爲促其成。人事卒卒。負諾責十年矣。顧巽卿詩可輯者。僅南社集中數十首耳。欲求諸其家。卒不得便。嘗爲胡九耐翁言及。亦無復音。以是耿耿。頃於舊報中檢得其丙辰丁巳間作十餘首。恐遂散失。存之以備異日之求。並報悔老。示不忘也。卅五初度次鈍庵醉歸夜起韻云。流光卅

五隨川水。古淚今愁任長消。已覺秋風生短鬢。坐看明月起中宵。心塵不動天如醉。身世無聞市有簫。汰盡浮名甘守默。臥聽人海漲新潮。報許峴青表弟天津云。三年不見子。咳唾託書郵。大任誰爲寄。吾生空若浮。道家養生空虛若浮月寒燕市酒。波吼洞庭舟。萬念成滄海。憑君騁遠眸。寄亞子海上時討袁兵敗云。我亦飄零客。萍踪寄此身。關山遊子夢。風雨故人情。世效雞蟲食。心驚草木兵。殘民咎誰屬。天下一人橫。按末句謂袁氏也。丙辰端午書懷云。家家蒲艾胃當門。座滿清香酒滿樽。湘怨千年人忘屈。楚歌四面孰哀哀。死生日日勘情緒。憂患年年記淚痕。極目長天風雨後。夕陽一角是中原。余嘗評此詩。死生四句沉痛悽惋。筆兼出入。今十餘年矣。回視猶昨日耳。村居夜坐云。悔逐聲華與世浮。藏山文字儘千秋。貪書偶伴殘燈燄。渴飲能消苦雨愁。犬咽寒聲過別墅。樹撐

瘦影入危樓。人生去住原無定。又向天邊看月流。丙辰秋日南社雅集

棗園分韻得老字云。八月西風際剝棗。霜前蒲柳垂垂老。望中日月曾

幾何。愛景毋爲慕炎燠。往尋佳境獲幽栖。呼朋卅輩神相抱。社友三十餘人舞

雩遺響託雲行。棗園係會子祠別墅濠濮妙音識淵浩。醉後曲肱歌松風。是日用壁間山

谷老人武昌松風閣詩分韻一洗胸次煙塵空。黃葉滿園秋不掃。出門大笑天爲聾。

古近體俱各見老到之致。

巽卿與余倡和至多。每一詩成。郵筒互答。時余主日報。復爲文藝叢刊。

以張同社之作。所賴以存至今者。獨此耳。亦豈意十餘年後。半爲陳死

人耶。春感一首。柬鈍安乞和云。雲連野漠朔風寒。積雨經宵釀翠瀾。簾

外鳥聲驚客至。水中山色耐人看。冥心書劍孤懷盡。放眼乾坤一笑難。

大地祇容霜雪覆。蒼生何處託身安。時英德絕交中國亦擬加入鈍安過訪不遇。次見

贈韻云。虛勞空谷枉音塵。本是如來不繫身。萬柳拂雲榮舊主。君為是問講師

有柳當窗寄詩數及之一鶯臨水喚歸人。英雄已死湖山靜。時去黃蔡國葬纔數日桃李無

言草樹春。起視滿園花事盡。籬根猶印屐痕新。此西園作。余詩所謂重携老柳當窗句。來訪幽蘭辟世人也。巽卿嘗居西園。任學校事十餘年。其貞固如此。雪霽一首。束鈍安云。薄醉不成飲。嚴寒釀小晴。履冰忘道坦。覲日撥雲明。久負約梅趣。因無釣雪情。遠觀難一白。麓樹界天清。又丁巳元日書懷云。春濃柏葉酒初醺。賀節聲隨爆竹聞。終古人天此日月。於今朝市等煙雲。夔龍斲斲疑傷足。雞鶩頻呻肯護羣。莫笑風塵多溷迹。隔江山色要平分。終古一聯特雋。讀伯杞詩竟。即題其稿後云。湘詩後進推伯杞。孕理摛辭迴不羣。萬古春魂伴憂患。滿腔靈氣鬱煙雲。鐫心不拾前人慧。投足初為空谷聞。可奈雨絲風片惡。坐將蘭芷挹清

芬。伯杞何人未詳。此蓋巽卿自道其作詩之旨也。此外尚有七言古一

章。題為重九日為今希少樵初度之辰。酒集玉樓東。同人賦詩。以壽。分

韻得九字。兼示在座諸君子。詩云。塵如野馬雲如狗。世事海田成白首。

智名勇功不介懷。何用黃金印懸肘。深江舉舉若兩劉。志以淡泊明其

守。一朝疆出佐時需。時同為記室長沙不與流輩爭妍醜。迴憶西園舊日游。十

年倏忽殊先後。今希同學少樵同事均在明德大劉阿耘千里駒。今希令子雪耘才士也酒間見之可謂秀

發秃翁嶽崎可釋負。今希年五十天涯一秃翁少劉不惑鬢未霜。龍蛇起陸

猶堪走。澗松挺秀雪無權。籬菊滋芳風獨厚。百年不隨大化遷。形骸合

與天倪偶。鯤鵬未展北溟翼。雲水招同篔簹笠友。壺中日日長青春。一杯

權進茱萸酒。持螯剝髓不盡味。大嘯一聲張衆口。酒半叔容惡作劇更有傅子

解人頤。鈍安不許吞聲作重九。意氣敷腴樂且融。貪飲故爾頌君壽。男兒

身健當任重。人才不數蟠溪水。虎豹雄鬚牙。麒麟在郊藪。酌以大斗祝君黃者。此會同集者多。然如巽卿今希叔容。已各傷殂逝。惟少樵雖老病。尙能爲齊魯之游。而栩園无諍醉安雪耘。雖近在一城。亦常稀相見。讀此不勝中年哀樂之感矣。

邑先輩李筱初先生。名青蕃。以拔貢舉於鄉。官雲南知縣。工書能詩。子孫多繼其業。長君少棠名發柯。初爲諸生。革命後。亦官雲南。爲丙姝縣知縣。豪氣絕倫。與先君交尤篤。筱老遺詩不多見。少翁嘗錄其四首見示。茲從舊篋搜得。亟錄之以備文獻。寄懷羅順恂同年。其一云。昔我策駑蹇。籥足附清塵。蹠躩遊上國。顏色始益親。鄙質慚汶閣。篤荷顧殷勤。高文豁寸眸。豪論擴咫聞。激昂志邁俗。踔躑才軼倫。側目終南徑。溷跡冀北羣。鍛翮旣同慨。抱璞彌自珍。翔鳳豈在笱。投魚非無綸。窮達一任

運。無爲念詘信。其二云。偏隅古淶水。靈岑俯江涓。中阿構精廬。旁舍連荒祠。講學眷往哲。繼軌得經師。嶽嶽康成席。汲汲仲舒帷。明德勗交勉。古誼聆紛披。頹習信堪振。高懷亮弗羈。新秋蘭佩爽。暇晷槐陰移。散步恣遐矚。探幽凝妙思。修塗恨余阻。不獲展光儀。闊絕歷寒暑。疏懶復何辭。其三云。負風翔天衢。隊雲越滄海。揚子擅述作。江郎鬱文采。端居念同儕。飛湛各異軌。玉堂一何清。金臺一何邇。自非甘隱淪。獻策良有待。廣廈方構材。擷蘭而掇莖。商飆御桂輪。騰躍昵多士。前路等蒼茫。感喟無由弭。誰言老嗜書。丹黃險青紫。其四云。賤子久濡滯。運阨嬰憂傷。先芬知所誦。寸朽何以藏。汲古負三餘。策名無一長。中年遭埴壤。弔影增淒涼。過河泣枯轍。肱沙困浮陽。回首念疇曩。甘苦難較量。平生心跡清。微尙鑑冰霜。雙蹄未得逞。六翮何由翔。飢驅出門去。躑躅復徬徨。願言

指路歧。庶以履康莊。羅湘潭人。時爲涿江書院山長。故第二詩云云。旁舍連荒祠者。書院左爲靖興寺。舊祀李衛公也。詩境凝厚。頗似唐初。今則邑人能嗣音者鮮矣。

錄李筱老詩後。續搜得其長君少棠先生遺箸數首。蓋丙辰丁巳間長沙和作。雖非其至。然存者亦僅矣。因亟錄之。念此不勝人琴之感。次韻和雪耘紡紗廠宴集得高字云。年少才攀屈宋高。詩成又許奪虬袍。一聲錚鐵天空響。百鍊精金沙裏淘。春氣融融流翰墨。秋心隱隱繼離騷。不甘裘馬稱公子。獨斲椎輪運匠刀。此會共五人。爲余華盦劉少樵袁雪安劉生雪耘及余華盦爲主人。以西北有高樓分韻。雪耘蓋得高字也。和黃巽卿春感云。圍爐兀坐怯春寒。如水心思止不瀾。鳥語分明隔牆聽。花容嫵媚捲簾看。三辰管領原非易。到處逢迎總是難。習習東風

吹凍去。願君走馬赴長安。語有所諷。湘城坐雨一首。東鈍公云。侵晨連夜雨滂沱。溜瓦飛檐奈響何。約客未來因路濕。吟詩不就爲題磨。錫簫聲頓前門歇。車馬喧從曲巷過。想見湘江春水色。滿添新綠上漁蓑。此詩係和徐。極以爲不能稱原作。堅囑勿出。亦見其晚年豪氣漸減也。時君既自滇中告歸。頗憂生事。不得已乞爲小吏。之桃源爲監稅。猶記臨行余戲爲書扇云。贈君手中扇。媵以阜財風。莫向秦人問。如今世不問。君則拍手大驩。謂磊塊應如是澆。庸知荏苒十餘年。君墓木遂已拱耶。皮君葺岩。鹿門經師之孫也。云頃撰其先祖年譜。於日記中鈔得甯鄉周達武詩二首。達武字渭臣。咸豐初。嘗與其邑人王永章起鄉軍。號章武軍。後俱積功至提督。周爲武人。不知其亦能詩也。因貽書囑錄。見提署古樹感懷云。古樹堂均聳。高如北斗尊。向榮徵造化。獨立鎮雄藩。既

得崢嶸氣。還沾雨露恩。斜曛栖萬鳥。接翅息嗔喧。其二云。閱歷風霜久。奇形老餘枝。根槃隨地轉。雲影插天垂。萬古成精鍊。千林仰楷麾。有人傍樹立。想像論功時。此詩竟以託鹿門日記而傳。亦云幸矣。

湘中詩僧笠雲寄禪而外。首推海印。海印名永光。自號憨頭陀。益陽人。工詩能畫。知醫藥。爲南社社友。其游無方。嘗卓錫甯瀉之密印。或居長沙之開福士林二寺。其出家剃度。則在沅江之景星寺。故死葬沅江。余游景星寺詩。所謂林樹葉深秋未覺。老僧塔在我來遲。圖詩猛憶長沙集。掩淚何堪讀短碑者也。沅人和之。並他作刊爲瓊湖倡和集。凡二百餘首。亦此公身後因緣也。海印詩存者。凡數巨冊。在景星寺。其徒某處。余在沅日。嘗欲爲刊行。惜方困於兵。未果。茲檢舊藏。錄其十餘年前寫寄之作。以存梗概。其絕句尤工。如都門雜感九首云。憫忠閣下開蓮社。

遠公無句惱詩人。軍持乞取楊枝水。欲與羣芳洗劫塵。

法源寺舊爲憫忠閣在京師彰未

義門內

破笠芒鞋百裊衣。道人無事看雲飛。首陽山下幽栖在。芳草春深

蕨菜肥。雙輩盤雲出內庭。御河橋畔柳青青。東山白髮垂垂老。隔院笙歌不忍聽。十叟豪情壓少年。柳花亭角又飛綿。傷心太液池邊月。偏向天涯冷淡圓。隔江聞唱大銅鞮。西苑沈沈煙樹迷。二十五絃亡國淚。落花寒食杜鵑啼。孤城落日一起邊哀。鞞鼓聲聲逼塞來。聞道燕王能下土。黃金高築集賢臺。遼海覆師沈鐵戟。邊沙戰鬼聚陰燐。哀忠塔下空惆悵。荒雨寒原一愴神。哀忠塔在法源寺唐貞觀間建蕭蕭弓劍薊門過。聞說哥舒夜渡河。山鬼一聲邊月苦。中原將帥已無多。自捲袈裟自捲單。杖頭瓢笠帶雲還。飽諳世味終無奈。珍重閑雲莫出山。益陽白鹿道中感賦云。複磴層溪古木齊。黑雲低壓日沈西。斷鐘零雨瀾江寺。荒草淒迷鶯亂啼。瀾江

寺距白鹿寺四里許  
事實詳益陽縣志

獵火燒山雲樹連。裴亭空弔郭都賢。江聲冷咽巖  
花落。白鹿無家已四年。裴公亭雲樹菴俱益陽  
名勝離白鹿寺里許諸作中頗寓滄桑之感。  
頭陀殆亦不能忘情於世局歟。

海印詩存余處者。尙有五七律數十首。俱極工至。信爲方外詩人之傑  
出者。五律如丙辰六月九日山中卽景書感云。嘉木羣陰合。澄溪六月  
寒。幽篁懸石磴。斜日下江灘。投樹鳥奔竄。無家僧老殘。禪栖清夜迥。鐘  
梵繞蒲團。臥疴山中兼示悟靜主云。臥疴巖檐下。人煙隔岸分。林禽千  
嶂曉。幽竹一溪雲。榔栗從茲去。鐘魚不可聞。住山須結足。塵世亂紛紛。  
宜園哭夏甫存先生云。移琴還舊里。跌坐哭幽人。已結山中約。甯知劫  
外因。乾坤悲故壘。興廢贖遺民。詩稿存何處。斜陽一愴神。斷石橋感舊  
淒然有作云。兵火驚疇昔。江山已寂寥。倉皇携弟妹。零亂過溪橋。同治  
辛未

益陽紅巾起事城中大亂余  
母携弟妹及余避兵於此

路險哀慈母。雲迷問老樵。傷心餘斷石。辛  
苦咽深宵。宿瑤華山館偶成云。瑤溪微雨過。幽戶夜栖禪。林下觀朝槿。  
巖邊鳴細泉。親朋存幾輩。離別又三年。鬱鬱西陵寺。孤鐘搖夕煙。五首  
中三四淒斷。餘亦於景色中時寓感慨。故知老僧非真忘世者。又有五  
古三首。爲丙辰六月次伯庠夏日閑居韻云。幽人入庭戶。繞閣微涼生。  
山雨從東來。蒼翠橫檐楹。旨酒自爲樂。哀歌慰遠情。攬衣坐徘徊。悠悠  
孤月明。江雲不可掬。散髮水雲隈。相期素心人。小築移琴來。一日復一  
日。一杯復一杯。曠觀古與古。此樂能幾回。丈人乞買山。一髻如螺鬢。中  
有黃石公。高歌去不還。亂離親故散。奔竄無時閒。長揖謝幽人。憂心多  
苦艱。此詩尤豪宕。可概其平生。

海印詩七律至多。每一寫寄。動十數紙。卽在余篋者。亦幾不勝錄。然皆

雅瞻沈摯。不作衲子儉寒語。見者或不知其爲方外人也。嘗與論教宗語。曰禪悅。曰歡喜。曰慈。曰悲。曰忍。曰捨。佛之情性。固亦猶人。初未嘗以遯山林忘世事爲教。而高僧作詩。卽亦不必皆如寒山拾得一流。作無謂之機鋒語也。海印深以爲然。海印少居沅江。沅人張伯琴太守。嘗起北渚閣於景星寺後。藏書居其中。海印因從學詩。終身師事之。伯琴淹博。故海印所得尤多。以是能脫出禪家詩派。而與當世風雅巨公相周旋。沅人爲余言之如此。足知其所由來矣。茲更錄其七律中數首如下。丙辰秋日琴莊雅集。南社諸子待傅大不至。得詩一首。兼呈座客云。琴莊裙烏社堂開。破笠芒鞋一衲來。落日洞庭南雁盡。亂山鞞鼓北兵回。尊前別緒江淹淚。樓外秋聲庾信哀。更有幽人招未得。蒲團趺坐獨徘徊。此贈余作也。又丙辰七月旣望。腴深將遊西湖。花鬢妓僧叔輿子大。

夢湘蒨甫谷青實賓穆庵並道香和尚。集上林寺餞別。得詩二首。兼呈座客云。鐵鳳棲檐夜有聲。九人同坐梵堂清。尊前論事空投幘。亂後題詩不署名。南渡江山懷白下。西冷煙雨託蒼生。此行應比柴桑健。吟鬢蕭蕭一劍橫。去年京雒同爲客。今夕長沙又送春。三海弦歌想疇昔。四年裙烏惜離羣。哀時未了江南淚。望遠難忘薊北雲。我亦臨歧共惆悵。况兼明日正秋分。六月晦日次周熠欽贈別原韻云。葛衣藤榻住山城。未許人間識姓名。脩竹當門巾扇冷。幽雲繞澗夜泉清。濂溪有社徵遺事。野納無心遯世情。杯酒離亭今又別。柳邊風笛一帆輕。枳槿編籬一徑開。舊朝人物患多才。江山慘淡悲離黍。霸跡銷沈剩古槐。元祐幾時除黨禁。楚詞重疊付深杯。他年拄杖還山日。尊酒招君定肯來。偶檢舊報見悔晦詩話中。轉錄余元二間所爲鈍庵。脞錄二則。頓觸舊

感以當時所錄數百則。經亂以後。皆已不存。今猶得藉悔公存其一二。又皆近錄湘先賢詩所欲得者。可謂女回娘家矣。因復錄之於此。吾鄉黃子壽先生彭年。寄籍貴州。治術藉藉人口。尤富著作。好爲詩。五古尤工。錄其官陝時蒼葭四詠。其一去草淹留鵠山下。承乏來西秦。官舍鞠茂草。呼童翦荆榛。慨思周任言。惡去善者伸。吾心似山谿。開塞豈無因。其二蒔花。柏園秋氣多。蒔花養春意。望澤須及時。向晚先得地。愛花盼花開。惜花恐花萎。殷勤好扶持。此理通於治。其三編籬。吾愛蒼蒼葭。霜氣猶未淡。編爲幾籬落。上下隨陂坎。聊以示範圍。亦不礙觀覽。隨時補其罅。豈畏羝羊撼。其四疊石。終南隱朝霧。突兀起庭中。高峻不可及。鹿角將毋同。我乏補天術。聊借他山攻。諸君勤砥礪。霖雨望方隆。按此公野趣甚濃。宦游所至。時有林園之樂。以余所見。官蘇時則築可園於滄

浪亭前。並置藏書。自刻一像。題曰娜嬛之犬。意在守藏勿失也。官鄂時。則構乃園於佘山。今爲武昌首義公園。猶留題額。曰可日乃。命名俱奇。而可園在滄浪亭尤切。此四詩者。殆亦園林之詠。因以言政。可見老輩高抗風流。非今日袞袞諸公鞅掌簿書者。可企其萬一也。

悔公詩話中所存余勝錄。其二爲長沙楊烈士篤生名守仁。居英時暑假遊山諸作。惜其不全。耶訶賴云。驅車亂石坡陀地。駐策連岡繚繞中。一角窮湫明續水。幾分靈雨待飄風。羣羊欲起無人叱。七聖皆迷有路通。翠女及時張廣樂。與君長嘯賦崆峒。自注云是日湖岸空氣清明天色晴霽遙望山谷中密雨如霧日光穿漏有若垂虹采色奇幻。又云青禽作意嗜幽奇。無賴岡巒護小陂。定有神光來雜遝。似聞靈吹動參差。回風與襲瑤姬帳。夢雨猶飄神女旂。浦思山哀誰會得。逃陽滿目竭來遲。自注云維多利亞女皇在位時喜耶訶賴景物佳勝每年必以暑中游憩於此湖旁小屋

數椽居人謂是故女皇休憩處耶。詞類實荒寂蕭寥。大有特別賞識也。又云。同谷歌中窮谷寒湫景象。故女皇之於山水。殆具有特別賞識也。

清流玦珮邈難尋。大壑龍蛇感不禁。世外神鷹藏健羽。煙中萍鹿避機

心。正憐泥炭供炊賤。饒有松枝扈蹕陰。咫尺湖山成予奪。曠觀天地一

沈吟。自注云山中舊多鷹巢巖石間甚為猛健然今日已是罕見又野鹿甚多畏獵者不常至人踪繁密處或云鹿善嗅能於數里外識

獵者槍烟未知其然否也山谷中澗水沮洳偏生黑蘗此物生殖力既強新舊累積遂成泥炭居民掘此切作方磚暴風日中俟其乾得以代

薪此地既為故女皇所喜遂圍釐道不許尋常人驅車其他一道為尋常人車道石徑華礪相望僅十餘丈而苑枯懸絕此山為英貴族馬鏗

濟氏私產釐道種種特茂密而他則否英人產業分配不均其生計大略可知也 數詩寓感於興。尤足見外國

風土。烈士居英。喜究心有用之學。即其詩可知也。

前錄同縣李少棠先生詩。僅得七律三首。既非其至。又屬僅存。不無遺

恨。乃文字有靈。適以尋他文。復檢舊篋。竟得其丁巳四月游麓山一詩。

則紀事長篇。堪彌前憾已。惟作者與竹筠湘正及先君十餘年來俱先

後逝世。余亦略血幾死。是則不禁悲涕耳。題云。四月二十四日。鈍安尊

人潤菴先生。邀余與張君竹筠遊岳麓。謁黃蔡二公墓。鈍安為買划船。

沿橘洲渡河登山。先至高等師範學校。晤文君湘正。偕行歸途。遇雨紀

詠。詩云。結伴遊名山。山有名人墓。原存展墓心。因緣看山路。振衣出城

西河廣舟能渡。環繞橘洲行。洪波觸風怒。生乘怯水威。持咒鎮驚怖。

畏水常誦 同儕縱笑言。我心酸如醉。綠柳盈雙眸。不敢分行數。須臾近

岸前。滿身乍和煦。失道理平平。攜手緩趨步。遂至學校門。駭觀納麓甸。

學校舊為嶽麓書院前門惟楚有材於斯為盛一聯猶存 舍宇極寬宏。規

模已非故。相見得良朋。十年離把晤。文君任學校教務長 遂以日防冲。

欽然羅食具。飯後乃登高。昂頭左右顧。燈長脚力微。徐行蹲且住。涼颼

從峽來。撼動青蒼樹。春色豔無邊。躑躅燃紅炷。經過白鶴泉。苔痕喜再

遇光緒戊子讀書半墜閣寺鐘。逕向迴巒赴。靈秀萃於斯。蔡公所

安瀆。佳壙初初成。崇封待壑固。淑氣鍾扶輿。天降龍蟠護。更上崔嵬巔。

林徑藤蘿附。截穴項額閒。嶽神雲車駐。形勢仰建瓴。邱壑兩交互。滔滔

湘江橫。屏障若棋布。楓樟卷翠陰。胚胎同太素。卜葬有黃公。壘石重焉

錮。何難我王公豐功綿國祚。名人瘞名山。寺載獨欽慕。革命諸子賢。烈

墳旁相附。恭敬既已將。躡蹻下山懼。就訪雲籠宮。茗談博禪趣。絕頂覲

天光。四週騰煙霧。胸次朗朗開。火錯豈容鑄。來時燦朝暉。歸鳥黃昏暮。

依舊呼前舟。舟子不他雇。天空突沈霾。驟發雨如注。浪濺舊花飛。帆爨

暉。惻惻。愁予胆猶寒。兀坐危朝露。慨彼舟子言。藍縷羞紈袴。誰知眼福

輕。酬謝海貽誤。登岸時舟子請隨上山觀遊因在校門坐待意謂余輩必從前門出可往行乃由後門登山久不相識歸則

途竟却羨夜勝晤。明德教後裕。有亭肯構堂。儒業青箱村。驢蹕收圭盟。

雲夢供吞吐。隨侍尊公遊。萊彩舞嬰孺。諒有琳琅篇。滄桑增覺悟。慚愧

剗數鴟。寢解紳袖蠹。因之紀芳踪。聊此蘭臺賦。此詩最爲先君所賞。嘗

有和作。冷秩不齊。細想當年撰杖游。曲之樂。不可復得矣。痛哉。

茲憶及寧鄉詩人。岳障東遺詩。索之不得。乃於無意中。忽檢出其詩已

寫寄之稿數寸。若隱有詔之者。則又錄不勝錄矣。古體如秦良玉錦

袍歌。瀟湘錄作云。紺衫氈笠燕城中。狼火燐燐蜀山紅。九牧男兒齊解

甲。裹衣未戰雌王雄。當年傑主慶陵亡。枋政官家半逆璫。文臣媿阿武

臣。輒冠裳劍佩徒鏘鏘。老賊李張釁刃起。百萬官軍鼓聲死。饑氓藍縷

出門悲。荷戈臣賊賊大喜。西川禍孽永寧生。半夜危城噪士兵。大梁僞

號竄神宙。誰攬戎衣殺賊行。古來世亂慳奇才。天頑地慳無精神。營頭

星孛不妨大。自有女俠扶高宸。忠州山水天下奇。生才何必冠而髻。七

吳錦袍飛上馬。長稍左右雙龍螭。當昨涕淚夫君逝。宣撫遺軍親領隊。  
旄教何弟播州行。自拔精兵扼關塞。四十餘城烽火滅。歸來袍濺降王  
血。轉戰東西娘子軍。奉詔提師衛王室。數章詩賜平臺貴。女臣大有鬚  
眉氣。煌煌金印袖中攜。仍戴唐王拜遙賜。此時西蜀盜如毛。億萬人畜  
囉兵刃。獨留石柱彈丸地。千賊萬賊聞風逃。女侯此袍元戎裝。汗血不  
着燕脂香。縱橫紅錦三千丈。爲覆蒼生若箇長。古來巾幗勇絕倫。未聞  
以外梁夫人。女將遼金繡旗出。石龍陣隊寶幟新。繡旗女將寶幟  
夫人見代醉編前明  
靈袖得盛名。歲祀我拜沈雲英。道州沈雲英代父爲  
參將見毛西河集煌煌勝國衣冠辱。  
忠義並著春陵城。吁嗟乎。典午強胡有如此。廟謨恤試戎衣矣。士夫袖  
爭竟無聲。烏論珠繡孱女子。君家此袍慎藏戢。定有英靈噴今日。雷夜  
雷燐閃夜青。玉華葉葉蛟龍泣。可謂事奇人奇詩奇矣。按秦良玉事。有

醴陵令董耀焜之大父。所著芝盦記傳奇若干卷。先君舊以經課前列。  
得獎此書。今同付亂中灰燼矣。

岳障東尤喜爲律詩。駿快豪邁。不可羈勒。故所寫寄者尤多。如陽曆丙  
辰除夕云。一年都盡陰陽曆。兩地猶爲去住身。南北風塵迴倦馬。乾坤  
劫火贖勞人。江東吟鬢早成雪。湘上梅花猶作春。且盡老懷醒復醉。自  
他歲臘舊兼新。歲暮飲酒云。湖上一千三百日尊。前五十七年人。細傾  
竹葉那知老。翻笑梅花徒自春。簷禽啄粒行行去。木客吟詩句句新。不  
是人間愛遊戲。囊書白髮尙風塵。歲暮醉書云。文章輕賤身徒在。天地  
生成鬢已華。故國飄零仍歲晚。近家羈寓更天涯。山容到戶白消雪。湖  
氣漾燈紅正花。戎馬江南拂衣反。不妨沈醉在長沙。湖氣句新穎。瑞雪  
喜賦云。五千年世更雖久。三十爐錢鑄豈多。黃胄人猶才蹇甚。蒼生汝

奈命窮何。暄風春盡翔鴻雁。瑞雪秋高有黍禾。欲與閭閻閒一醉。催租無吏數經過。春雪云。湖上暮寒微霰天。漸作瓊月吹過船。到戶無聲灑曉夜。茫然一色迷坤乾。花枝初結影在水。木介思淹春隔年。六出愁看汝幾响。曉簷晴旭聲涓涓。偶作拗體。亦自應手。立春夕酌丁巳作云。愁聽歲臘千家鼓。獨嘯乾坤兩鬢霜。舊事隔年猶涕淚。春風明日又壺觴。籬根雪草餘殘白。湖柳晴枝裊穉黃。老臥南荒官榻冷。筆花吹滿夢中香。遊妙高峯學校示男德釗云。三徑離吾屐笠久。兩廂羨汝圖書陳。映簾湘水白疑鷺。到戶麓山青可人。入夜萬燈湧星氣。倚雲隔岫無市塵。東南名勝亦游倦。悔不名山來幅巾。丙辰冬夜獨酌云。乍澣風塵老眼明。梅花爲我放新晴。湖山四壁照巾影。霜月一城鳴柝聲。庾信還山驚世變。桓彬飲酒悔狂名。雞蟲得失人間事。只管壺觴夜細傾。俱見老到。

障東律詩不假思索者爲多。然亦有沈摯者。如寄懷胡壬杰滇中云。自爲滇海三年別。遠斷雲天一紙書。劫火江南孤劍在。胡塵天地幾人居。嶽雲晴捲好放鶴。湘水春深宜餉魚。應悔一官嵐瘴地。白頭彈鋏出無車。此較他作爲深至矣。然駿快固是本色也。讀少陵宿府有感走筆次韻云。俯江城郭朔風寒。官廨歸來臘正殘。朋舊幾存音問斷。湖山半帶淚痕看。今宵白酒獨成醉。來日蒼生知大難。爲問胡塵萬里徧。可無風雪一巢安。皆此類也。哀王湘綺丈云。湘潭海內大名知。京洛歸來雪滿髭。老病尙煩公勸酒。疏狂却愛我將詩。千年天喪斯文日。一死才空大宙時。舊贈綈袍不忍看。欲開篋衍淚如絲。其爲湘綺所重也如此。又絕句漫書云。風塵老衲雙弓米。煙火頑仙一酒尊。世運已更秦日月。此身那更問桃源。五律如哭黃克強先生云。五運皆皇帝。乾坤有殺傷。君才

迴地軸。民國破天荒。天下戈鋌險。人間日月忙。爲余惜書篋。遺墨淚汪洋。自江南歸。句書君贈。余有書比黃金不厭多之句。哭蔡松坡先生云。斯才起故國。偉業冠當

今。鹿逐中原陰。龍潛大澤深。雲南一旅出。天下血師侵。再造民邦殞。爲時一愴吟。東歸云。亂離卷書帙。遠沂大江回。姚馥狂成渴。桓彬老諱才。秋雲衡嶽屐。暮雪洞庭杯。懶散南荒久。渾忘白髮摧。歲暮云。已覺年時暮。頻看歲事新。傍湖髡柳雪。藏塢早梅春。家世書恆產。乾坤酒賸人。間衙童僕散。夜夜一燈親。春正試筆云。惻惻復悽悽。春風憶鼓鼙。亢龍燕薊北。戎馬洞庭西。雄鬼旁城嘯。逃氓沿岸啼。過年把詩筆。舊事怕重題。初春云。帶雪鶴初警。覓詩驢則乘。凍香寒臥筆。賸醪夜吹冰。晴氣蘇湖柳。春聲走市燈。老懷城外散。隨意石闌凭。皆能自寫襟抱。

孫君姬瑞。自署蟲天室主。蓋取蒙莊惟蟲能蟲。惟蟲能天之意。爲善化

孫芝房先生之孫。門人孫生茂柏之尊人也。嘗以丙辰入南社。一時寄詩至多。其遺集茂柏嘗欲寫定就商。以謀刊行。旋有美洲之行。竟亦未果。茲錄余篋中所存者。以見一斑。小遊仙八首云。一夕天風散五銖。楚腰扶上六萌車。玉顏名在昭陽次。愁斂雙蛾翠不舒。南岳夫人道者裝。東方符節女平章。一從羽駕崆峒去。金粉樓臺已夕陽。歷徧神山採藥歸。桑田今見海羣飛。人間遊戲渾閑事。笑把浮丘一拂衣。偷遺玉佩漢皋遊。鳩鳥何心怨蹇脩。乞得靈妃親口訣。朝回雲擁五花蚪。天魔夜舞影參差。轉綠迴黃又一時。青鳥不歸花落盡。慵妝猶自出簾遲。生悔天孫誤聘錢。銀河無底鵲橋填。壺中應有療饑術。待把蟠桃種作田。星娥月姊舊同盟。提挈鸞鸞到上清。共向淮南乞丹訣。雪中雞犬不聞聲。忘憂無地采華芝。桂樹婆娑月上遲。一局棋枰猶未了。不知柯爛已多時。

此蓋諷時事而作。語有寄託。非漫作香奩語也。

孫姬瑞又有新本事詩十二首。蓋丁巳作。其事皆已注明。讀之猶能回憶也。詩云。昭儀合德偶參差。樊嫔調停枉費詞。一段閑愁消不得。空廊

燕去雨如絲。譏段內妒巧爭妍各不同。引他蜂蝶逗牆東。誰憐一夜封

姨怒。吹散殘英滿地紅。哀國撥雨繚雲夢未消。玉駟來往鵲成橋。背人

暗滴桃花淚。釀出銀河一夜潮。惡政花下同盟姊妹親。剛迴淺笑忽成

嗔。蘭閨秘草相思約。却把蕭郎作路人。悲獨翠被香消鄂渚舟。停辛佇

苦總溫柔。一從選入昭陽殿。顰笑隨君不自由。傷黃鬢髮斜拖墮馬妝。

侍兒齊擁謁君王。紅絲千里憑誰繫。應悔蘭姨錯主張。斥張誤認張星

是角星。生來弱質怨伶俜。鳩媒何苦相勾引。扶上金輿夢未醒。悲復深

鎖春閨又六年。錦衾角枕夢成煙。旁人猶羨癡兒福。那識儂心苦似蓮。

閱清太妃也

欲移蓮步故踟躕。城北偷窺態有餘。恨煞黃鸝苦催客。隔窗眉

語事終虛。刺徐東海

河間姣女數錢工。意態翩然天外鴻。莫道燕支山

色好。阿儂生小愛吳中。指河西樓病骨瘦珊珊。互約尋芳怯倚闌。風雨

不堪花已盡。折枝何事待春殘。諷陸使北伐暗卜金錢事易乖。渡江桃

葉最關懷。花陰收拾殘棋局。莫放鴉兒下玉階。趣南京政可作稗史存

之矣。

蟲天古體亦多佳構。嘗和余孤松行一首。又自寫寄其平時之作。亦得

數章。茲彙錄如此。死友有知。其許我乎。和鈍公孤松行即贈云。霜雪滿

天地。孤松胡後彫。秉節固特殊。匪伊託地高。奇枝不低屈。中幹無旁撓。

寧辭蛇虺侵。願結鸞鶴巢。空谷激天籟。歲寒期久要。抗此雲外蹤。峻潔

表其操。櫟以不才棄。桐因入爨焦。得免斧斤厄。養晦全天叟。原詩為余

辟地居環中作。故和作云云。立秋與客泛舟湘流。月夜泊麓山下云。白露泣青楓。瀟湘莽秋意。扁舟隨興發。日落餘霞麗。嫋嫋風始涼。娟娟月初霽。微煙澹沙渚。暝色連睥睨。岸迴市聲雜。星定燈光細。孤懷寄芳荃。萬事等飄蒂。感茲節物更。早晚雁南戾。情隨逝川永。夢入寒雲翳。獨夜忽聞鐘。觀心了無繫。此作尤綿麗。託興在二謝之間。東園種菜云。甘雨土膏動。衆芳媚晴飈。山廚備嘉蔬。耘莪方及時。列圃疏渠水。毋使蔓草滋。寒菘摘未盡。新韭割已遲。豆籬及瓜蔓。青紫紛參差。晨起露未晞。携筐親采之。素餐古人恥。學圃聖所嗤。繫余百無能。夙稟疏野姿。神慮苟自適。胼胝安敢辭。緬彼於陵子。一飽無餘思。雨霽山行云。積雨淹林臥。靄然春已深。始聞晴鳩語。庭宇散輕陰。迎暄步場圃。巾屨踐幽尋。空煙白山光。孤秀竦遙岑。和風被原隰。衆綠生遠心。新茗冠故柯。芳穎約鳴

禽。隨化欣物態。延賞契冲襟。雖無箕穎跡。自會山水音。徜徉謝形役。微尚寄孤吟。皆出湘綺一派。殊足見其所詣。

湘潭何君特循。西園舊同事也。頃以其宗人簡庭先生所著梅陰山房詩草二卷鈔本見示。云將付刊。屬爲點定。重違其意。爲校閱一過。簡庭名拔秀。道光時進士。嘗與縣人陳旭岩黎壽民馬午初黎友林黎蕉山等十六人。結詩社於潭城之懺心寺。歷久不渝。見詩注中。其詩託體雖不甚高。佳者亦自清微淡遠。惜稿本未經刪定。多隨筆應酬之作。病久不耐審思。但正其脫誤。並圈出其尤雅者數十首而已。亦一文字因緣也。秋日閒居兼示族弟子雨云。亭臺連日護雲陰。團扇徘徊思不禁。樹帶商音和夜讀。雨添涼味釀秋心。門無人到葉三徑。花爲誰香桂一林。相遲子由瞻望久。對牀可許共清吟。游山云。仰止逾十載。攀蘿直自今。

古松三徑韻。午日一山陰。地早得秋氣。人初生道心。湘流滿眼在。東去大江潯。相賞不盡處。重來訪翠微。蒼苔封古碣。修竹隱禪扉。名勝小爲住。老僧閒未歸。扶筇下山去。回首賸斜暉。春日游五臺。禪林兼訪王生。曉鏞云。超出紅塵到此鄉。靜參禪味一登堂。無心古佛閒於我。鎮日清聞寶鴨香。深深庭院綠陰清。物外勾留且寄情。千枕游仙初睡醒。諸天鐘磬一時鳴。青氈位置託禪林。山水澄清爲滌襟。福地倘能分著我。煙蘿來往日沈吟。此三詩最近自然。能寫禪林清靜之趣。與其他酬倡之作迥殊。其數此者。如薄暮訪小耘山長不遇云。出郭攀蘿來。滿目載暮景。不必主人遇。此間味自永。山空道心生。萬籟皆寂靜。桐葉時一鳴。漸有秋風冷。昭陵道中山行云。斷續峯巒自送迎。排空蒼翠削難成。攀蘿一徑蜿蜒入。人在山雲頂上行。桃源風景絕塵埃。思卜幽居闢草萊。一

帶松篁吟眺好。黃昏蟲語出山來。俱可誦也。

簡庭梅蔭山房詩草中。尙有詠史諸作。最爲刻意經營。匠心獨運。非泛泛應酬諸詩可比也。作者工力俱於此類見之。七絕如晉武帝云。河山魏蜀已殘灰。一片風帆鐵鎖摧。太息江南甫清晏。五千吳妓入宮來。惠帝云。一門魚肉爭何劇。滿座貂蟬續已多。知否洛陽宮外路。縱橫荆棘掩銅駝。七律如羊太傅云。軍國先儲十載糧。風流裘帶鎮邊疆。門庭市惠私何敢。肝胆論交敵可忘。一代元勳推太傅。千秋遺愛感襄陽。朝廷若使勤圖治。未必平吳誤武皇。岳武穆云。提兵誓欲復中原。唾手燕雲氣已吞。與國同仇竭肝胆。此軍難撼鞏屏藩。十年屢歷關河戰。三字誰伸父子冤。何日黃龍能痛飲。郾城人馬悵空屯。韓蘄王云。東南日夜詔書馳。兵馬親提屢出師。巾幗倍伸軍士氣。錦衣爭覩相公儀。隻身轉戰

江淮捷。雪涕忠言廟社維。三字獄成前事慘。西湖山水一驢騎。文信國公云。半閑堂內蟀空鳴。軍國支持仗老成。社稷計難恢寸地。聖賢書可質平生。六飛煙水孤忠悼。終古乾坤正氣撐。倘許黃冠承顧問。興朝恩義倍光明。張文獻公九齡云。大臣風度鎮朝端。獻替忠忱夙夜殫。經濟鑑陳千載寶。恩情扇感早秋寒。四年丞相荊州老。萬里君王蜀道難。他日曲江尊酒祭。叢祠空謁遠來官。按集中此類之作。時時有之。大抵皆讀史之餘。藉資論列者。故用筆多沉著。持論亦覺平允。得之爲不易也。尋集中詩注。知簡庭爲道光丙午科舉人。官寶慶府學教授。其詩起道光二十九年己酉。終同治元年壬戌。凡十四年。其祖若父皆宿儒也。道州何棠蓀觀察維棟。一字卷庵。爲煖叟之孫。詩蓀之弟。生平著作甚富。其所爲駢散文及詩。嘗爲羅意園徵君刊行。其後又續出潛隱詩二

集十卷。及煮冰詞一集。皆庚戌成都自刊者。劍川趙藩石禪老人序其詞。謂其負沈博絕麗之才。寄託幽窈。體骨俱秀。擷先民之長而無其末流之弊。夫惟息之也深。斯達之也亶。有不得已而後言。言之不足。又詠歎之。詩與詞固無二理。觀所作信乎其無溢譽者已。菩薩蠻春望云。澄江倒映樓臺碧。柳腰柔。繡嬌無力。莫上最高梯。盡頭煙雨迷。溶溶春水綠。艇子前溪曲。風聚野塘萍。杜鵑啼數聲。頗似飛卿。寓意幽遠。減蘭牆陰孤花云。雪姿霜性。雨打風吹。枝輕勁。躲在籬笆。過了籬笆。是別家。孤芳無著。歲歲自開還自落。且莫移挪。全借春泥護惜他。命意自新。臨江仙云。半捲珠簾紅日午。花間夢暖鶯雛。背明張鏡畫眉初。喚郎看仔細。究竟入時無。綺陌踏青三月暮。東風吹送香車。嬉春女伴莫相呼。怕將游賞事。虛占繡功夫。背明張鏡。實寫細熨。可謂能造語矣。南鄉子云。羅

幙掩雲屏。花氣陰陰護碧樨。深院忽聞人笑語。休驚。夢覺檀郎酒半醒。香霧幾多層。中透紅燈的的明。白玉狻猊眠又起。潛聽。滿樹梨花夜雨聲。聞景殊覺富麗。狻猊言爐。則眠起言煙矣。香霧云者。殆指此歟。卷庵於詞學之甚晚。嘗有句云。五十爲詩高常侍。我比公年加二。蓋自題其詞稿語也。

棠蓀煮冰詞中長調亦多可誦。茲錄其數闕如下。高陽臺秋思云。雲幕兜寒。雨絲織恨。高樓凝望成癡。午院無聲。驚聞門外騶嘶。幾番展約黃花酒。到黃花已後芳時。黯銷凝。倚遍回闌。送盡斜暉。蓬山瞥眼滄桑換。想劉郎此去。舊徑都迷。溝水西東。人間是處天涯。愁來閉着窗兒坐。怕青禽覓路稽遲。更憑誰乞借并刀。翦斷相思。可謂字字幽咽矣。雙雙燕和梅溪云。銜泥未了。被檐雀爭巢。去溫趨冷。春雨江南。逐蝶杏花枝並。

窺遍天窗露井。更覓地回翔未定。蘭閨兩度東風。不是當時釵影。前徑紅肥翠潤。奈夢被鴉驚。語輸鶯俊。遷延且住。目送畫樓煙暝。要把雕梁試穩。姑忍待來年芳信。怕教剪爪吳宮。十二珠簾久凭。詠物詞如此作法。純是寓不平之感。所謂借他人酒杯澆自己塊壘也。慶千秋和稼軒立春云。老去蘇髯。逐世間兒女。短鬢簪幡。凍雲乍開又合。添釀些寒。鄒枚勝侶。十年來夢斷梁園。尋曲讌。酥花茅葉。都非舊日椒盤。卻怪東君多事。儘妝林繡野。從不偷閒。偏於少年獨嬾。一任凋顏。樓臺蜃氣。趁寒潮早暮循環。愁待到紅嬌綠膩。落英又送春還。原作下半闕却笑東風。從此便熏梅染柳。更沒些閒。閒時又來鏡裏。轉變朱顏。詞家以爲稼軒諷小人之作。如秦檜一流者是。和作則但流連風景耳。

潛穎詩集中七律時有佳作。如海上云。夜涼如水客登舟。謝豹嬌啼且

未休。詞客自來哀窈窕。壯懷聊復寓溫柔。愁遺洛浦陳玉佩。夢覺揚州杜牧樓。眼底不勝桑海變。一番春事一番秋。此側豔也。結聯特雋。經城陵磯入荆江云。鴨欄江上客舟還。桂編晴暉一解顏。遠水碧浮夢澤樹。夕陽紅畫洞庭山。湘帆隱見滄波外。楚塞興亡野燒間。雁鷺紛紛弓繳盡。橫流終古急潺湲。夕陽七字明媚無倫。答黃小魯同年云。山閣黃花夜雨涼。清燈相對鬢邊霜。崢嶸舊侶餘歌泣。老大詩情更倔強。世局何心分孔墨。人才無地著班揚。我懷惆悵巴江棹。天末襟裾淚數行。體似稍變。漸入沈著一派矣。時賢二三十年來酬倡之作。大皆如此。其體規自散原諸人。風靡天下。勝道咸同光四朝之以膚淺填委爲事者矣。又答伯嚴兼簡實甫云。清涼山下池塘夢。秋盡扁舟十日還。勝地園亭一携手。中原文酒幾開顏。飽諳世味行歸隱。賸有詩心不放閒。珍重臨歧

繞朝策。豈應留滯久鄉關。皆是類也。棠蓀昔嘗與易實甫程子大諸人聯吟於長沙蛻園。成湘社集。詩中所謂湘社風流嗣蛻園者也。其他各體亦多佳構。今不具錄。

琴源山房遺詩五卷。附詞一卷。湘潭言友恂雲笙著。羅汝懷郭嵩燾爲之序。郭稱其生平重交游氣誼。言詩專主東坡。七言古變化流麗。爲得於東坡之深者。五言清深婉約。氣局稍別。羅序亦稱孝廉於詩無他嗜。獨主髯公。所作具有清思逸致。視叫囂以爲才氣。拉雜以爲瑰瑋者。獨有翛然塵表之觀。又稱潭之詩人。自順治朝以至乾隆。相續不絕。如郭幼隗王山長唐魏子陳滄洲。張湘門張紫峴諸先生。先後輝映。紫峴至嘉慶初猶存。諸老既歿。兩湖詩社嗣出。歲會月要。轉視前輩爲盛。蓋時方殷盛。物力充裕。諸君優閒無事。藉此銷日。已而生事日絀。詩社日疏。

不復有往日宴遊之樂。至道光末。而此調不彈久矣。邑中年相若而過從之久者。莫如馬明經敬之言孝廉友恂。嘗欲偕二君重振兩湖。以稍延先輩風雅之緒。既無往者。詩社寬閒之境。二君遽相繼奄化。余益無意爲詩。而二君則皆有詩草存也。云云。序蓋慨乎言之。可備潭中詩乘矣。五言如七夕。曉岑許見過不至。次東坡韻云。入秋十日強。無日無秋雲。秋雲不可狀。縹緲絕似君。今夕是何夕。銀河落清樽。遙知對牛女。玉顏挹微醺。我有綠綺琴。宛轉龍鸞紋。不諧俗耳賞。欲覓知音聞。美人期不來。林暝月已昏。山妻更洗盞。頽海得金渾。可謂善作坡語矣。他如走筆招黃山人云。見君亦無語。不見卽無聊。涼秋九月初。孤館風蕭蕭。生徒苦羈絆。愁坐已終朝。欲尋谷口遊。跡恐隨漁樵。沈子昨歸來。昏睡如懶貓。須君一喚醒。霍若醇酒澆。同坐爲豪談。使我愁煩銷。君此肯來就。

新詩以相招。皆足見其所詣。

琴源七言古。規仿東坡。自成一格。湖湘三百年來。善學長公者。無如此君用力之深。構體之似也。其佳者。如再疊前韻。懷謙庵先生云。公如明月來復去。不使長圓對秋夜。老來詩句轉雄快。我來對壘氣先下。可憐淺水不容舟。坐看江河浩東瀉。中秋月出相遮留。黃雲連天收罷亞。主人賢愛客自豪。白酒肥魚我能借。相逢一笑那易得。况有新詩凌鮑謝。人生能得幾中秋。明月主賓皆得舍。拚將萬事付東流。閒看小槽壓甘蔗。別來十日九風雨。秋光已作老境怕。思公便腹方晝眠。可有門生解嘲罵。此置之長公集中。幾可亂真。長公本以詩論名。其筆陣固絕似矣。又其疊韻無迹。亦長公所長也。岳陽樓對月云。長風迅掃蒼煙開。青天萬里無塵埃。倒捲天光作湖底。醉把重湖爲酒杯。落日欲盡還徘徊。中

流照耀金銀臺。須臾變滅隨瀕洞。四坐無言肅然恐。高樓連空如欲動。  
滿耳風濤浩呼洶。酒酣胆粗言語大。倚闌喝月青天外。一輪早已生湖  
心。始信水天本無界。波光搖盪水晶毬。玉宇迢迢一碧蓋。中原壯觀此  
爲最。十載謀生吁可怪。高官大賈連帆檣。我亦扁舟載書畫。金門放歸  
不足道。文字無靈賤猶賣。江湖廊廟心尙存。吳楚乾坤句非隘。書生懷  
抱天所開。對此能不一痛快。是時月高湖湧波。游人更進金叵羅。舟子  
漁子已散盡。鴻雁白露空中多。上下一視無纖瑕。古今往來真剎那。但  
愁此境飄瞥過。有酒不飲當如何。吁嗟乎有酒不飲當如何。奇趣橫溢。  
得坡詩奧蘊獨深。王靜安論詞。謂非絕頂聰明。勿學稼軒。余謂不獨稼  
軒。古來絕頂聰明。何如東坡。東坡之詩。又豈笨伯所能得其皮骨哉。  
琴源五七言律亦多佳構。如寄題黃山人聽松草堂云。灤水東西屋。何

家大小山。路從黃葉去。門有白雲關。愛子隱成癖。幽尋殊未還。紅塵浩  
如海。我亦在人間。兀坐不成趣。懷人春晝長。寒煙澹竹色。細雨聞花香。  
濁酒今誰共。新詩不可忘。長鏡吾有約。天意恐茫茫。關韻香韻高古。兩  
結亦皆不落尋常。懷黎枚臣云。百里蒼山外。秋風日夜生。斯人渺何許。  
望遠若爲情。涼菊向人澹。孤雲隨意行。西湖佳詠在。讀罷有餘清。則筠  
老所謂清深婉約者也。又如鑿石浦工部祠云。昔時杜陵老。此地一登  
臨。涕淚乾坤眼。風塵天地心。清湘遺蹟古。嶽色入秋深。悵望荒祠畔。山  
煙下暝禽。二月十四日雨云。春雨雖云好。淒清當奈何。愁隨碧煙起。夢  
與落花多。見說前溪水。平添幾尺波。明朝放晴景。燕子數來過。二詩皆  
一氣呵成。能脫科舉時試帖之氣。不易得也。七言律如懷黎月喬夫子  
云。如公不合長貧賤。生計飄零二十年。兩度馳驅向京國。一身涕淚滿

秋天。鵝鴻得路人爭羨。松柏凌霜節更堅。潦倒門生最相憶。幾時風雪醉樽前。此作純乎宋律。闖入蘇黃矣。又如歐陽養泉伯仲招飲云。三年失意誰憐我。百里來游爲看山。此地關心幾朋好。對君竟日解塵顏。相逢忍說明朝事。盡醉翻疑舊夢閒。擬謝世緣同卜築。茅茨指點白雲灣。皆能不失家數。琴源中道徂謝。故其詩存者無多。然在沅湘耆舊續集中。故當占一頭地也。

前錄岳障東詩有可補者。障東字百川。別字蔗坡。又號窈叟。甯鄉人。光緒己丑科第三名舉人。大挑授道州學正。截取直隸州州同。分發安徽。時嘉興沈曾植任皖藩。並障東與湘潭舉人汪根甲同修官書。在皖與湘潭張貢父浙人王葆楨黃巖黃性巖倡和無虛日。戊申丁內艱歸。兄衡及弟翰東先後繼卒。家難迭乘。益自放於詩酒。鼎革後。歷任湘陰檢

察益陽湘潭典獄等官。與湘綺老人酬倡頗多。民國十年六月卒。年六十二。遺稿待刊者甚多。已刊者有金臺賽雪吟一卷。絳雪絃詞一卷。其從子門人岳德威來言如此。又資陽任內詩稿。則丙辰丁巳之作。前所錄詩多見卷中。其未錄者。如資陽卽目云。緇塵萬里還。薄宦水雲間。簷掛浮邱月。城圍漢壽山。孤禽棲暝早。高柳倚風閑。湖上淹留久。蕭蕭雙鬢斑。三四寫地望。以卽景出之最佳。又其從子德基。字白堅。知普安縣舉人衡之子。出爲長兄子。嘗爲常德法官。喜爲詩。卒年三十六。有朗江吟稿。待刊。巡塘道中口號云。陰晴醞釀嫩寒天。浩蕩春光到眼前。萬朶菜花黃帶雨。一溪楊柳碧拖煙。村帘幾處客沽酒。湖水半篙人放船。暮色蒼茫向何處。野桃無語故嫣然。可想見俊年英氣。

補錄蟲天室主遺詩數首如下。續宋遺民錄云。麥秀河山涕淚多。扁舟

晞髮向陽阿。田橫賓客今誰在。嗚咽荒臺擊筑歌。玉匣珠襦付劫灰。五陵龍蛻草成堆。年年寒食冬青樹。惟有江頭野老哀。鞀鼓倉皇曲未終。冰天消息斷征鴻。舊時供奉黃冠老。曾見銅仙出漢宮。樂橋坊畔草侵門。獨抱寒香晚節尊。一幅畫蘭誰省識。旁人休擬趙王孫。此詠謝皋羽。翔至鄭所南思肖諸人作也。語特沈痛。又小詩五首。題云。荒園一隅。雜植花樹。意有所觸。各題小詩。金橘云。有橘產南豐。移根化爲枳。採供玉盤食。酸澀沁人齒。氣質易變更。凡物類如此。藤花云。繁英綴瓔珞。容色鮮且嬌。偶依孤松樹。遂引百尺條。常恐根本傾。飄落不終朝。辛夷云。春風入園來。羣卉葉未碧。鞞鞞辛夷花。紫苞銳如筆。虛名竟何補。芳采終自惜。芭蕉云。濃陰蔚晴綠。赤日不知暑。綿綿未展心。一寸千愁緒。秋懷警長夜。怕聽敲窗雨。秋海棠云。血淚沍啼紅。幽懷向誰訴。本無向陽心。

獨飲秋宵露。不隨桃李榮。差免蜂蝶妒。詠物詩須有寄託。如右五詩各寓自警之意。可作箴銘。意深遠矣。

炎夏鬱蒸。苦熱無俚。忽得涼雨。意緒頓新。因補錄孫姬瑞遺詩。又得其五古三首。適如余所欲言也。夏日西軒野眺云。山居屬多暇。值此炎晝長。濁醪旣罷酌。開軒一以望。熏風育時苗。高下綠無央。晴煙媚陽采。野秀靄連岡。流波汎輕鳧。幽籟嘒潛蟄。予懷各有會。物態應無方。晷移賞不遷。理愜機迺忘。卽此解天伐。濯髮以徜徉。結體頗追二謝。予懷十字。尤見會心。大勝宋人靜觀自得之句矣。晚過雷橋云。雲樹隱孤洲。迴沙激寒瀨。不因川原敞。豈攬衆峯會。平橋控遐觀。空秀入襟帶。晴皋散笠影。淨綠交脗靄。有時農歌寂。風泉答清籟。孤情晚夷猶。歸徑尋煙外。此則全仿湘綺翁。三四兩句開閣尤爲居要。知此則無滯筆矣。苦熱得雨

云。避暑如避仇。望澤如望赦。皇天無偏私。涼燠相代謝。驚飈忽撼窗。水氣稍沈榭。池荷盡披拂。庭樹相低亞。夢回水簾清。賓退玉觸罷。已欣煩疴滌。坐覺塵縛卸。浩蕩凌虛翔。體輕若羽化。開軒獨延爽。明月窺簾罅。此亦力摹王翁。雖鋪叙平直。故是賦體也。余檢此詩。因偶誦避暑如避仇。望澤如望赦之句。初不記何人作。跋燭遍尋諸家存稿得之。居憂不自作詩。不然。幾被強奪入余新稿矣。附記以志一時之感。惜夫逝者九原。不能起而共證。以爲笑樂也。

鈍盦臞錄卷三

跋

鈍盦臞錄三卷。爲鈍安逝世數月前作。先是吳稱三師著續沅湘耆舊集數十卷。未鋟而卒。君取篋篋衍。燬於民國六年長沙日報館之火。居恆引爲深憾。泊主湖南省立中山圖書館。編訂館書目錄。迺慨然以恢宏師旨。網羅湖湘文獻。自任。會丁父憂。兼病久歿。盡辭省垣各校國文課。深居簡出。因得瀏覽近人詩詞小集。從事評選。揭登國民日報副張。日數百字。蓋皆臨時屬稿。畀手民者。輒以明日剪報粘存。自春徂夏。哀然成帙。嘗持以示余。謂所錄已踰百家。雲起軒詞鈔及懺慧詞觚菴詩存外。皆已故湘賢。使鏤而弗舍。不難舉吾湘六十年來之詩人。盡入吾錄中。子其助我蒐求乎。乃不數日而長沙難作。倉皇出走。賈志以沒。吁可慨已。自世變日亟。大雅不作久矣。近代詞人著作。其名不甚顯著者。